

Visoki predstavnik daje podršku poboljšanju statusa Srba u HNK i FBiH



Visoki predstavnik u Bosni i Hercegovini Valentin Inzko boravio je danas u Mostaru gdje je prisustvovao okruglom stolu u organizaciji „Koordinacije Srba Mostar“ pod nazivom „Nekonstitutivnost srpskog naroda u Ustavu Hercegovačko-neretvanskog kantona“.

U pozdravnom obraćanju na početku skupa, visoki predstavnik je izrazio podršku naporima koji imaju za cilj poboljšanje statusa Srba u ovom kantonu ali i u cijeloj Federaciji BiH. Učešće visokog predstavnika na okruglom stolu je nastavak dosadašnjih napora u smislu poboljšanja formalno-pravnog statusa Srba kao dijela ukupnih aktivnosti da se osigura da svi narodi i građani Bosne i Hercegovine budu ravnopravno zastupljeni na cijeloj teritoriji BiH.

„Odlukom visokog predstavnika iz 2002. godine, kojom su doneseni amandmani na Ustav Federacije BiH u okviru implementacije odluke Ustavnog suda BiH o ravnopravnosti konstitutivnih naroda, utvrđeno je da ti amandmani imaju prvenstvo nad svim nedosljednim odredbama kantonalnih ustava, zakona, propisa i akata. U pravnom smislu to znači da nije potrebno donošenje drugih normativnih akata kako bi se osigurala pravosnažnost tih amandmana u kantonima. Međutim bez obzira na pravnu stranu stvari, i to stalno ističem, kantoni i dalje imaju obavezu da usklade svoje ustave sa Ustavom

Federacije BiH," istakao je visoki predstavnik tokom svog današnjeg izlaganja u Mostaru.

Visoki predstavnik je izrazio uvjerenje da će međunarodna zajednica, OHR i on lično nastaviti podržavati sve koji rade na uklanjanju institucionalne diskriminacije i osiguranju ravnopravnosti.